

Yakin Kepada Allah SWT

Daripada Abi al-Abbas, Abdullah bin Abbas R.Anhuma berkata:

كُنْتُ خَلْفَ النَّبِيِّ يَوْمًا فَقَالَ: يَا غُلَامُ إِنِّي أَعَلَّمْتُكَ كَلِمَاتٍ: إِحْفَظِ اللَّهَ يَحْفَظْكَ، إِحْفَظِ اللَّهَ تَجِدْهُ تُجَاهَكَ، إِذَا سَأَلْتَ فَاسْأَلِ اللَّهَ، وَإِذَا اسْتَعَنْتَ فَاسْتَعِنْ بِاللَّهِ. وَاعْلَمْ أَنَّ الْأُمَّةَ لَوِ اجْتَمَعَتْ عَلَىٰ أَنْ يَنْفَعُوكَ بِشَيْءٍ، لَمْ يَنْفَعُوكَ إِلَّا بِشَيْءٍ قَدْ كَتَبَهُ اللَّهُ لَكَ، وَإِنْ اجْتَمَعُوا عَلَىٰ أَنْ يَضُرُّوكَ بِشَيْءٍ، لَمْ يَضُرُّوكَ إِلَّا بِشَيْءٍ قَدْ كَتَبَهُ اللَّهُ عَلَيْكَ، رُفِعَتِ الْأَقْلَامُ وَجَفَّتِ الصُّحُفُ. رَوَاهُ التِّرْمِذِيُّ. وَقَالَ: حَدِيثٌ حَسَنٌ صَحِيحٌ. وَفِي رَوَايَةٍ غَيْرِ التِّرْمِذِيِّ: إِحْفَظِ اللَّهَ تَجِدْهُ أَمَامَكَ تَعَرَّفْ إِلَى اللَّهِ فِي الرَّخَاءِ يَعْرِفَكَ فِي الشَّدَّةِ، وَاعْلَمْ أَنَّ مَا أَخْطَأَكَ لَمْ يَكُنْ لِيُصِيبَكَ وَمَا أَصَابَكَ لَمْ يَكُنْ لِيُخْطِئَكَ. وَاعْلَمْ أَنَّ النَّصْرَ مَعَ الصَّبْرِ وَأَنَّ الْفَرْجَ مَعَ الْكُرْبِ وَأَنَّ مَعَ الْعُسْرِ يُسْرًا.

Maksudnya: “Pada suatu hari adalah aku berada di belakang Nabi SAW, lalu Baginda bersabda: Hai anak! Aku akan mengajarmu beberapa perkataan. Peliharalah Allah, nescaya Dia memeliharamu. Peliharalah Allah, nescaya engkau dapati-Nya di hadapanmu. Apabila engkau meminta, maka mintalah kepada Allah. Dan apabila engkau memohon pertolongan maka pohonlah pertolongan itu dengan Allah. Dan ketahuilah! Sesungguhnya umat itu kalau mereka berkumpul untuk memberi manfaat kepada engkau dengan suatu, tidaklah mereka dapat memberikannya kepada engkau kecuali dengan suatu yang sudah dituliskannya oleh Allah atas engkau. Dan jika mereka berkumpul untuk membahayakan engkau dengan suatu, tidaklah mereka dapat membahayakan engkau kecuali dengan suatu yang mudah dituliskannya oleh Allah atas engkau. Diangkatkan segala pena dan telah keringlah pula segala buku. Dirwayatkan oleh al-Tirmizi, dan katanya hadis ini hasan sahih.

Dan pada riwayat selain al-Tirmizi - *ada menyebut - Peliharalah Allah, nescaya engkau dapati Allah di hadapan engkau. Kenallah Allah pada masa lapang, nescaya Dia mengenali engkau pada masa susah. Dan ketahuilah! Sesungguhnya apa-apa yang (ditakdirkan) tidak datang kepada engkau, tidaklah ia kena pada engkau. Tetapi apa, yang kena pada engkau tidaklah tersalah kena pada engkau. Dan ketahuilah! Sesungguhnya kemenangan itu serta kesabaran. Dan sesungguhnya perlepasan itu berlaku selepas kesusahan. Dan sesungguhnya bersama kesusahan itu ada kesenangan.*”

Pedoman dan Iktibar Hadis

Antaranya:

1. Wajib bagi kita umat Islam mentaati perintah Allah, sama ada yang wajib secara *fardi* atau bersifat jemaah. Antaranya ialah melaksanakan ibadat solat, apatah lagi jika dilakukan secara berjemaah di masjid atau di surau.
2. Qadak dan qadar wajib diimani oleh orang Islam. Walaupun begitu, berusaha dan berdoa kepada Allah hendaklah seiring dalam mengimani rukun iman yang berkaitan qadak dan qadar.
3. Sifat Rasulullah SAW sebagai *murabbi* sentiasa mendidik sahabatnya, sekalipun sahabat tersebut masih kecil. Inilah yang sepatutnya menjadi agenda orang Islam yang dewasa dan ibu bapa untuk mengasuh dan mendidik nilai mulia dan iman dalam masyarakat.
4. Anjuran Baginda SAW kepada sahabatnya supaya bergantung harap kepada Allah dan memohon pertolongan dengan-Nya. Inilah yang sepatutnya menjadi amalan umat Islam selaras dengan konsep:

إِيَّاكَ نَعْبُدُ وَإِيَّاكَ نَسْتَعِينُ

Maksudnya: *Engkaulah sahaja (Ya Allah) yang kami sembah, dan kepada Engkaulah sahaja kami memohon pertolongan.*

(Surah al-Fatihah: 5)

5. Makhluq dan sesiapa pun tidak boleh memberi manfaat dan mudarat pada hakikat yang sebenar terhadap seseorang kecuali dengan izin Allah.

6. Sabar, ertinya bertahan menempuh sesuatu yang sukar. Sabar yang terpuji adalah sabar dalam mengerjakan taat kepada Allah SWT, menjauhi segala maksiat dan sabar di atas segala takdir-Nya. Tetapi di antara sifat sabar itu, maka sabar kerana mengerjakan taat dan meninggalkan maksiat adalah sabar yang lebih utama dari sabar di atas segala takdir yang amat susah dan menggelisahkan perasaan.

Mutiara Hikmah

- ❖ **Wahab bin Munabbih Rahimahullah berkata:** Aku telah mencatat dari kitab seorang dari Hawariyin. Jika ditimpa kepadamu bala maka senangkan hatimu sebab engkau telah dijalankan di jalan para Nabi dan solihin. Jika diberikan kepadamu kesenangan, maka menangislah sebab engkau telah dijalankan di jalanan yang berlawanan dengan jalan yang dijalani oleh para nabi dan solihin.
- ❖ **Pujangga berkata:** Jika ditimpa musibah atau kesusahan apapun, bersuka rialah dengan hari yang terus berlalu, kerana pergantian hari demi hari akan semakin mengurangi umur dari kesusahan itu. Kesusahan adalah satu rentangan umur seperti umur manusia yang tidak boleh kamu andaikan bilakah akan berakhir.

Kisah Teladan

Ali bin al-Husain RA berkata: Jika Allah SWT mengumpulkan orang-orang yang terdahulu dan yang akhir, maka ada seruan yang memanggil: Di manakah orang *ahlul fadhli*, lalu bangkit beberapa orang yang langsung menuju ke syurga, maka disambut oleh Malaikat dan ditanya: Hendak ke mana kamu? Jawab mereka: Ke syurga. Ditanya lagi, sebelum dihisab? Jawab mereka: Ya, sebelum hisab. Lalu ditanya: Siapakah kamu? Jawab mereka: Kami *ahlul fadhli*. Lalu ditanya: Apakah kelebihanmu di dunia? Jawab mereka: Kami jika diganggu orang kami maafkan dan jika diperbodohkan orang kami sabar. Maka berkata Malaikat: Masuklah kamu ke syurga, maka sebaik-baik pahala orang yang telah beramal.

Kemudian ada seruan: Di manakah ahli sabar. Lalu berdiri sebahagian orang-orang dan terus menuju ke syurga. Maka ditanya oleh Malaikat: hendak ke mana kamu? Jawab mereka ke syurga. Ditanya lagi, adakah sebelum dihisab? Jawab mereka: Ya, sebelum hisab. Lalu ditanya: Siapakah kamu? Jawab mereka: Kami ahli sabar. Lalu ditanya: Bagaimana kesabaran-kesabaranmu? Jawab mereka: Kami sabar berbuat taat, dan sabar meninggalkan maksiat. Maka berkata Malaikat: Silakan masuk ke syurga, maka sebaik-baik pahala bagi orang yang beramal.

Kemudian ada seruan: Di manakah tetangga Allah SWT, lalu bangun beberapa orang dan langsung menuju ke syurga maka ditanya oleh Malaikat: Hendak ke manakah kamu? Jawab mereka: Ke syurga. Ditanya: Apakah sebelum hisab? Jawab mereka: Ya. Lalu ditanya: Siapakah kamu? Jawab mereka: Kami tetangga Allah SWT di bumi.

Lalu ditanya bagaimana tetanggamu? Jawab mereka: Kami cinta-mencintai kerana Allah SWT dan korban-mengorbankan kerana Allah SWT dan sambung-menyambung silaturahim kerana Allah SWT. Maka berkata Malaikat: Masuklah kamu ke syurga, maka sebaik-baik pahala bagi orang yang beramal.